

水經第十一

漢 桑 欽 撰

後魏 酈道元 注

明 吳 瑄 校

易水 滹水

易水出涿郡故安縣閻鄉西山

易水出西山寬中谷東逕五大夫城南昔北平侯王譚不同王莽之政子興生五子並避時亂隱居此山故其舊居世以爲五大夫城卽此岳讚云五王在中龐葛建績者也易水東左與子莊溪水合

水經 卷之十一

一

水北出子莊關南流逕五公城西屈逕其城南五公猶王興之五子也光武卽帝位封爲五侯元才北平侯益才安喜侯顯才蒲陰侯仲才新市侯季才爲唐侯所謂中山之五王也俗又以五公名居矣二館之城澗曲阜清山高林茂風煙披薄觸目怡情方外之士尚憑依舊居取暢林木其水東南入于易水易水又右會女思谷水水出西南女思澗東北流注于易謂之三會口易水又東屈關門城西南卽燕之長城門也與樊石山水合水源西出廣昌鄉縣之樊石山東流逕覆釜山下東流注

于易水易水又東歷燕之長城又東逕漸離城南蓋太子丹館高漸離處也易水又東逕武陽南蓋易自寬中歷武夫關東出是兼武水之稱故燕之下都擅武陽之名左得濡水枝津故瀆武陽大城東南小城卽故安縣之故城也漢文帝封丞相申屠嘉爲侯國城東西二里南北一里半高誘云易水逕故安城南外東流卽斯水也誘是涿人事明經證今水破城東南隅世又謂易水爲故安河武陽蓋燕昭王之所城也東西二十里南北十七里故傳逮述遊賦曰出北薊歷良鄉登金臺觀武陽

水經

卷之十一

二

三百五十八

兩城遼郭舊迹冥芒蓋謂是處也易水東流而出於范陽

東過范陽縣南又東過容城縣南

易水逕出范陽縣故城秦末張耳陳餘爲陳勝略地燕命趙蒯通說之范陽先下是也漢景帝中元三年封匈奴降王代爲侯國王莽之通順也易水又東與濡水合出故安縣西北窮獨山南谷東流與源泉水合水發北溪東西流注濡水濡水又東南逕樊於期館西是其授首於荆軻處也濡水又東南流逕荆軻館北昔燕丹納田生之言尊軻上

卿館之於此二城並廣一里許俱在罍阜之上上邪而下方濡水又東逕陽城西北舊竭濡水枝流南入城逕相豕西豕亘城側耶水塘也四周塋城深廣有若城焉其水側有數陵墳高壯望若青丘詢之古老訪之史籍並無文證以私情求之當是燕都之前故墳也或言燕之墳塋斯不然矣其水之故瀆南出屈而東轉又分爲二瀆一水東注金臺陂一水逕故安城西側城南注易水夾塘崇峻邃岸高深左右百步一釣臺參差交峙迢遞相望更爲佳觀矣其一水東出金臺陂東西六七十步南

水經

卷之十一

三

三百八十

有金北五十步側陂西北有釣臺高丈餘方可四步陂北十餘步有金臺臺上東西八十許步南北加減高十餘丈昔慕容垂之爲范陽也戍之卽此臺北有蘭馬臺並悉高數丈秀峙相對翼臺左右水流經通長廡廣宇周施浦渚棟堵咸淪柱礎尚存是其基構可得而尋意欲圖還上京阻行旅造次不獲遂心訪諸耆舊咸言昭王禮賔廣延方士至如郭隗樂毅之徒鄒衍劇辛之儔宦遊歷說之民自遠而屈者多矣不欲令諸侯之客伺隙燕邦故修連下都館之南垂言燕昭創之於前子丹踵

之於後故彫牆敗館尚傳鐫刻之名雖無紀可憑
察其古跡似符傳矣濡水自堰又東逕紫池堡西
屈而北流又有渾塘溝水注之水出遒縣西白馬
山南溪中東南流入濡水濡水又東至塞口古纍
石堰水處也濡水舊枝分南入城東大陂陂方四
里今無水陂內有泉淵而不流際池北側俗謂聖
女泉濡水又東得白楊水口出遒縣之西山白楊嶺
下東南流入濡水時人謂之虎眼泉也濡水東合
擅山水水道縣西北檀山西南南流與石泉水會
水出石泉固東南隅水廣二十許步深三丈固在
水經

卷之十一

四

三百八十

衆山之內平川之中四周絕澗阻水八丈有餘石
高五丈石上赤土又高一丈四壁直立上廣四十
五步水之不周者路不容軌僅通人馬謂之石泉
固固上宿有白楊寺是白楊山神也寺側林木交
蔭叢柯隱景沙門釋法澄建刹於其上更爲思亥
之勝處也其水南流注于檀水故俗有并溝之稱
焉其水又東南流歷故安縣北而南注濡水又東
南流於容城縣西北大利亭東南合易水而注巨
馬水也故地理志曰故安縣閭鄉易水所出至范
陽入濡水闕駟亦言是矣又曰濡水合渠許慎曰

濡水入深深渠二號卽巨馬之異名然二易俱出一鄉同入濡水南濡北易至涿郡范陽縣會北濡又並亂流入涑是則易水與諸水互攝通稱東逕容城縣故城北渾濤東注至勃海平舒縣與易水合闕駟曰涿郡西界代之易水而是水出代郡廣昌縣東南郎山東北燕王仙臺東臺有三峯甚爲崇峻騰雲冠峯高霞翼嶺岫壑冲深合煙罩霧耆舊言燕昭王求仙處其東謂之石虎罝范曄漢書云中山簡王焉之窆也後其葬採涿郡山石以樹墳瑩陵隧碑獸並出此山謂之石虎山山有所遺

水經

卷之十一

五

二石虎後人因以名罝之東麓卽泉源所導也經所謂閻鄉曲其水東流有毖水南會渾波同注俗謂之爲雹河司馬彪郡國志曰雹水出故安縣世祖令耿況擊故安西山賊吳耐蠡符雹上十餘營皆破之卽是水者也易水又東逕孔山北山下有鍾乳穴穴出佳乳採者爇火尋路入穴里許渡一水潛通流注其深可涉於中衆穴奇分令出入者疑迷不知所趣每於疑路必有歷記返者乃尋孔以自達矣上又有大孔壑達洞開故以孔山爲名也其水又東逕西故安城其所閻鄉城也歷逕荆

涇北耆舊云燕丹餞荆軻於此因而名焉世代已遠非所詳也遺名舊傳不容不詮庶廣後人傳聞之聽易水又東流屈逕長城西又東流南過武遂縣南新城縣北史記曰趙將李牧伐燕取武遂方城是也俗又謂水爲武遂津津北對長城門謂之分門史記趙世家云孝成十九年趙與燕易以龍兌汾門與燕燕以葛城武陽與趙卽此也亦曰分門門又謂之梁門矣易水東分爲梁門陂易水又東梁門陂水注之水上承易水於梁門東入長城東北入陂陂水北接范陽陂陂在范陽城西十里

水經

卷之十一

六

方一十五里俗亦謂之爲鹽臺陂陂水南通梁門淀方三里淀水東南流出長注易謂之范水易水自下有范水通曰又東逕范陽縣故城南卽應劭所謂范水之陽也易水又逕樊輿縣故城北漢武帝元朔五年封中山靖王子劉條爲侯國王莽更名握符矣地理風俗記曰北新城縣東二十里有樊輿亭故縣也易水東逕容城縣故城南漢高帝六年封趙將夕於深澤景帝中元三年以封匈奴降王攜徐盧於容城皆爲侯國王莽更名深澤易水又東渥水注之其水上承二陂於容城縣東

南謂之大渥澱小渥澱水南流注易水謂之渥同
口水側有渾渥城易水逕其南東合漉水故桑欽
曰易水出北新城西北東入漉自下漉易五受通
稱矣易水又東逕易京南漢末公孫瓚害劉虞於
薊下時童謠云燕南垂趙北際唯有此中可避世
瓚以易地當之故自薊徙臨易水謂之易京城在
易城西四五里趙建武四年石虎自遼西南達易
京以京鄣至固令二萬人廢壞之今者地壁夷平
其樓基尚存猶高一匹餘基上有井世名易京樓
卽瓚所堡也故瓚所與子書云袁氏之攻狀若鬼

水經

卷之十一

七

神衝梯舞于樓上鼓角鳴于地中卽此樓也易水
又東逕易縣故城南昔燕文公徙易卽此城也闕
駟稱燕太子丹遣荆軻刺秦王與賓客知謀者祖
道於易水上燕太子稱荆入秦太子與知謀者皆
素衣冠送之於易水之上荆歌起爲壽歌曰風蕭
蕭兮易水寒壯士一去兮不復還漸離擊筑宋如
意和之爲壯聲士髮皆衝冠爲哀聲士皆流涕疑
於此也余按遺傳舊跡多在武陽似不餞此也漢
景帝中元三年封匈奴降王僕鯨爲侯國也
又東過安次縣南

易水逕縣南鄭縣故城北東至文安縣與雩池合
史記蘇秦曰燕長城以北易水以南正謂此水也
是以班固闕駟之徒咸以斯水謂之南易

又東過束州縣南東入于海

經書水之所歷泂次注海也

漣水出代郡靈丘縣高氏山

卽溫夷之水也出縣西北高氏山山海經曰高氏
之山漣水出焉東流經于河者也其水東南流山
上有石銘題言冀州北界故世謂之石銘陁也其
水又南逕曰候候塘川名也又東合溫泉水水出

水經

卷之十一

八

西北暄谷其水溫熱若湯能愈百疾故世謂之溫
泉焉東南流逕興豆亭北亭在南原上欹傾而不
正故世以欹城目之東流注于漣水又東泉水注
之水導源莎泉南流水側有莎泉亭東南入于漣
水又東逕靈丘縣故城南水中自源南注漣水應
劭曰趙武靈王葬其東南二十里故縣氏之縣古
屬代漢靈帝光和元年中山相臧臬上請別屬也
地理志曰靈丘之號在武靈王之前矣又按司馬
遷趙敬侯二年敗齊於靈丘則名不因靈王事如
漢注漣水自縣南流入峽謂之隘門設隘於峽以

譏禁行旅歷南山高峰隱天深溪埒谷其水沿澗
西轉逕御射臺南臺在北阜上臺南有御射石碑
南則秀鄣分霄層崖刺天積石之峻壁立直上車
駕沿革每出所游藝焉漈水西流又南轉東屈逕
北海王祥之石碣南御所屈石柱北而南流者也
南過廣昌縣南

漈水東逕嘉牙川川有一水南來注之水出恒山
北麓雖川三合逕嘉牙亭東而北流注于漈水水
之北山行卽廣昌縣界漈水又東逕倒馬關關山
險隘是爲深峭勢均詩人高罌之病良馬傳嶮之
水經

卷之十一

九

行軒故關受其名焉關水出西南長溪下東北歷
關注漈漈水南山上起御坐於松園建祇洹於東圃
東北二面岫鄣高深霞峰隱日水望澄明淵無潛甲
行李所逕鮮不徘徊忘返矣

又東南過中山上曲陽縣北恒水從西來注之

漈水自倒馬關南流與大嶺水合水出山西南大
嶺下東北流出峽峽右山則有祇洹精廬飛陸陵山
丹盤虹梁長津泛瀾縈帶其下東北流注于漈漈
水又屈而東合兩嶺溪水水出恒山北阜東北流
歷兩嶺間北嶺雖層陵雲舉猶不若南巒峭秀自

水南步遠峰石磴逶迤沿途九曲歷睇諸山咸爲劣矣抑亦羊腸邛來之類者也齊宋通和路出其間其水東北流注于滏水又東左合懸水水出山原岫盤谷輕湍濬下分石飛懸水一匹有餘直灌山際白波奮流自成潭渚其水東南流楊湍注于滏滏水又東流歷山世謂是處爲鴻頭疑卽晉書地道記所謂鴻上關者也關尉治北平而畫塞於望都東北云北平不遠兼縣上所拯也滏水於是左納鴻上水水出西北近溪東南流注于滏水也又東過唐縣南

水經

卷之十一

十一

滏水又東逕左人城南應劭曰中人城西北四十里亦或謂之爲唐水也水出中山城之西如北城內有小山在城西側水銳上若委粟焉疑卽地道記所云望都縣有委粟關也俗以山在邑中故亦謂之中山城以城中有山之木因復謂之爲廣唐城也故中山記以爲中人城又以爲鼓聚殊爲乖謬矣言城中有山故曰中山也中山郡治京相璠曰今中山望都里二十里有故中人城望都城東有一城名堯始城本無中人之傳璠或以爲中人所未詳也中山記所言中人者城東去望都故

城一十餘里二十里則減但苦其不東觀矣異說咸爲爽矣今此城於盧奴城北如西六十里城之西北泉源所導西逕糧山北郎唐音讀近實兼唐水之傳西流歷左人亭注漉水又東左會一水水出中山城北郎中阜下亦謂之唐水也然於城非西在又名之謂雹水又兼二名焉西南流入漉並所未詳蓋傳疑耳漉水又東恒水從西來注之自下漉水兼納恒川之通稱焉卽禹貢所謂恒衛旣從也漉水又東右苞馬溺水水出上曲陽城東北馬溺水東北流逕伏亭晉書地道記曰望都縣有

水經

卷之十一

十一

馬溺關中山記曰八渡馬溺是山曲要害之地一關勢帶接疑斯城卽是關尉宿治異日之來非所詳矣馬溺水又東流注于漉漉水又東逕中人亭南春秋左傳昭公十三年晉荀吳率師侵鮮虞及中人大獲而歸者也漉水又東逕京丘北世謂之京南對漢頃王陵漉水北對君子岸岸上有哀王子憲王陵坎下有泉源積水亦曰泉上岸漉水又東逕白土北南卽靖王子康王陵三墳並列者是矣漉水又東逕樂羊城北史記稱魏文侯樂羊滅中山蓋其故城中山所道也故城得其名漉水又東

逕唐縣故城南北二城俱在漣水之陽故曰漣水
逕其東城西又有一水導源盧奴縣之西北是城
西平城之地泉湧而出俗亦謂之爲唐水也東流
至唐城西北隅竭而爲湖俗謂之唐池蓮荷被水
勝遊多萃其上信爲嬉處也其水南入小溝下注
漣水自上歷下通禪唐川之兼稱焉應劭地理風
俗記曰唐縣西四十里得中人亭今於此城取中
人鄉則四十也唐水在西北入漣與應符合又言
堯山者在南則無山以擬之爲非也闕駟十三州
志曰山治盧奴唐縣故城在國北七十五里駟所
水經

卷之十一

十二

說此則非也史記曰帝嚳氏沒帝堯氏作始封於
唐望都縣在南今此城南對盧奴故城自外無城
以應之考古今知事義全違俗名望都故城則八
十許里距中山城則七十里驗途推邑宜爲唐城
城北去山五里與七十五里之說相符然則俗謂
之都香山卽是堯山在唐東北望都界皇甫謐曰
堯山一名豆山今山於城北而如東斬絕孤峙唐
牙桀立山南有堯廟是卽堯所登之山者也地理
志曰堯山在南今考此城之南又無山以應之是故
先後論者咸以地理之說爲失又卽俗說以唐城

爲望都城者自北無城以擬之假復有之途程紆山河之狀全乖古證傳爲疎罔是城西北豆山西足有一泉源東北流逕豆山下合蘇水亂流轉注東入滹是豈唐水乎所未詳也又於是城之南如東一十餘里有一城俗謂之高昌縣城或望都之故城也故縣曰望都縣在唐南昌皇甫謐曰相去五十里稽諸城地猶十五里蓋書誤耳此城之東有山孤峙世以山不連陵名之曰孤山孤都聲相近疑卽所謂都山也帝王世記曰堯母慶都所居張晏曰堯山在北堯母慶都山在南登堯山見

水經

卷之十一

十三

都山故望都縣以爲名也唐亦中山城也爲武公之國周同姓其後桓公不恤國政周王問太史餘曰今之諸侯孰先亾乎對曰天生民而令有別所以異禽獸也今中山淫昏康樂逞慾無度其先亾矣後二年果滅魏文侯以封太子擊也漢高祖立中山郡景帝三年爲侯國王莽之常山也魏皇始二年破中山立安州天興三年改曰定州治水南奴縣之故城周之衰也國有赤狄之難齊桓霸諸侯疆理邑土遣管仲攘戎狄築城以固之地理志曰盧水出北平疑爲踈闕駟應劭之徒咸亦言

是矣余按盧奴城內西北隅有水淵而不流南北一百步東西百餘步水色正黑俗名曰黑水池或云黑水口盧不流曰奴故城北藉水以取名矣池水東北際水有漢王故宮處臺殿觀榭皆上國之制簡王尊貴壯麗有加始築兩宮開四門穿城北累石竇通涿唐水流于城中造魚池釣臺戲馬之觀歲久頽毀遺基尚存今悉加上爲刹利靈圖池之四周民居駢比填徧穢陋而泉源不絕暨趙石建武七年遣北中郎將始築小城興起北榭立宮造殿後燕因其故宮建都中山小城之南更築隔

水經

卷之十一

十四

城興復宮觀今府榭猶傳故制昔耿昭伯歸世祖於此處也滹水之右憲水注之上承城內憲水池自漠及燕涿滹水逕石竇石竇既毀池道亦絕水潛流出城潭積澱漲渭水東北注于滹滹水又東逕漢哀王陵北冢有二墳故世謂之兩女陵非也哀王是靖王之孫康王之子也滹水又東右會長星溝溝在上曲陽縣西北長星渚渚水東流又合洛光水水出洛光涓東入長星水亂流東逕恒山下廟北漢末喪亂山道不通此舊有下階神殿中世以來歲書法族焉晉魏改有東西二廟廟前有碑闕

壇場相列焉其水東逕上曲陽縣故城北本岳牧朝宿之邑也古者天子巡狩常以歲十一月至于北岳侯伯皆有湯沐邑以自齋潔周昭王南征不還巡狩禮廢邑郭仍存秦罷井田因以立縣縣在山曲之陽是曰曲陽有下故此爲上矣王莽之常山亭也又東南流胡泉水注之受胡泉逕上曲陽縣南又東逕平樂亭北左會長星川東南逕盧奴城南又東北川渠之左有張氏墓冢有漢上谷太守議郎張平仲碑光和中立川渠又東北合滏水水有窮通不常津注

水經

卷之十一

十五

又東逕安喜縣南

縣故安險也其地臨嶮有井塗之難漢武帝元朔五年封中山靖王子劉應爲侯國王莽更名寧嶮漢章帝改曰安喜中山記曰縣在唐水之西山高岸嶮故曰安嶮邑豐民安改曰安喜秦氏建元中唐水慎長高岸崩頽城角之下有大積木交橫如梁柱焉後燕之初此木尚在未知所從余考記稽疑蓋城池當初山水澆盪漂淪巨楫阜積於斯沙息壤加以城池板築旣興物固能久耳滏水又東逕鄉城北有舊盧奴之鄉也中山記曰盧奴有三鄉

斯其一焉後隸安喜城郭南有漢朝時孝子王立碑

又東過安國縣北

漣水歷縣東分爲二水一水枝分東南流逕解瀆亭南漢順帝陽嘉元年封河間孝王子淑於解瀆亭爲侯國孫宏卽靈帝也又東南逕任丘城南又東南逕安郭亭南漢武帝元朔五年封中山靖王子劉傳富爲侯國其水又東南流入于平池漣水又東北流逕解瀆亭北而東北注之矣

又東過博陵縣南

水經

卷之十一

十六

漣水東北逕蠡吾縣故城南地理風俗志曰縣故饒陽之下鄉者也自河間分屬博陵漢安帝永初七年封河間王開子翼爲都鄉侯順帝永建五年更爲侯國也又逕博陵縣故城南卽古陸城漢武帝元朔二年封中山靖王子劉貞爲侯國者也地理風俗記曰博陵縣史記蠡吾故縣矣漢質帝本初元年繼孝沖爲帝追尊父翼陵曰博陵因以爲縣又置郡焉漢末罷還安平晉太始年復爲郡今謂是城爲野城漣水又東北逕侯世縣故南城又東北逕陵陽亭東又北左會博水水出望都縣東

南流逕其縣故城南王莽更名曰順調矣又東南潛入地下博水又東南於瀆重源湧發東南逕三梁亭南疑卽古勺梁也竹書紀年曰燕人伐趙圍濁鹿趙靈王及代人救濁鹿敗燕師于勺梁者也今廣昌東嶺之東有山俗名之曰濁鹿羅地地不遠土勢相隣以此推之或近是矣所未詳也博水又東南逕穀梁亭南又東逕陽城縣散爲澤渚渚水濯漲方數里匪直蒲筍是豐實亦偏饒菱藕至若變童卍角弱年女子或單舟採菱或疊舸折艾長歌陽春愛深淥水掇拾者不言疲謠詠者自于

水經

卷之十一

十七

時行旅過矚亦有慰於羈望矣世謂之爲陽城澗也陽城縣故城近在西北故陂得其名焉郡國志曰蒲陰縣有陽城者也今城在縣東南三十里其水又伏流循瀆屈清梁亭西北重源又發博水又東逕自隄亭南又東逕廣望縣故城北漢武帝元朔二年封中山靖王子劉忠爲侯國又東合崛溝溝上承清梁陂又北逕清源城東卽將梁也漢武帝元朔二年封中山靖王子劉朝平爲侯國其水東北入博水博水又東北左則濡水注之水出蒲陰縣西昌安郭南中山記曰郭東有舜氏甘泉有舜

及二妃祠稽諸子傳記無聞此處世代又遠異說之來於是乎在矣其水自源東逕其縣故城南枉渚廻湍率多曲復亦謂之爲曲逆水也張晏曰湍水於城北曲而西流是受此名故縣亦因水名而氏曲逆矣春秋左傳哀公四年齊國夏伐晉取曲逆是也漢高帝擊韓王信自代過曲逆上其城望室宇甚多曰壯哉吾行天下唯雒陽與是耳詔以封陳平爲曲逆侯王莽更名順平濡水又東與蘇水合水出縣西南近山東北流逕堯始亭南又東逕其縣入湍湍水又東得蒲水口水出西北蒲陽水經

水經

卷之十一

十八

山西南流積水成淵東西一百步南北百餘步深而不測其水又東南流水側有古神祠世謂之爲百祠亦曰蒲上祠所未詳也又南逕安陽亭東晉書地道記曰蒲陰縣有安陽關蓋安陽關都尉治世俗名斯川爲安陽壙蒲水又東南歷壙逕安陽關下名關翠爲唐頭坂出關北流又東流逕夏屋故城實中嶮絕竹書紀年曰魏殷臣趙公孫哀伐燕還取夏屋城曲逆者也其城東側因河仍墉築一城世謂之寡婦城賈復從光武追銅馬五幡於北平所作也世俗音轉故有是名矣其水又東南流

逕蒲陰縣故城北地理志曰城在蒲水之陰漢章帝章和二年行巡北岳以曲逆名不善因山水之名改曰蒲陰焉水右合漁水水出北平縣西南魚山山石善巨焉水發其下故世俗以物色名川又東流注于蒲水又東入濡故地理志曰蒲水蘇水並從縣東入濡水又東北逕樂城南又東入博水自下博水亦兼濡水通稱矣春秋昭公七年齊與燕會于濡水杜預曰濡水出高易縣東北至河間鄭縣入易水是濡水與葦池漣易互舉通稱矣地理志曰博水東至高陽入河博水又東北徐水注

水經

卷之十一

十九

之水西出廣昌縣東南大嶺下世謂之廣昌嶺嶺高四十餘里二十里中委折五廻方得達其上嶺故嶺有五廻之名下望層山盛若蟻蛭實兼孤山之稱亦峻竦也徐水三源奇發齊瀉一澗東流北轉逕東山下水西有御射碑徐水又北流西屈逕南巖下水陰又有一碑徐水又隨山南轉逕東崖下水際又有一碑凡此三銘皆翼對層巖巖鄣深高壁立霞跣石文云皇帝以太延元年十二月車駕東巡逕五廻之嶮途覽崇岸之竦峙乃停駕路側援弓而射之飛矢踰于巖山刊石用讚元功夾

碑竝有層臺二所卽御射處也碑陰皆列樹碑官名徐水屈東北逕郎山又屈逕其山南岑山岑競舉若豎鳥翅立石嶄巖亦如劒杪極地嶮之崇峭漢武之世戾太子以巫蠱出奔其子遠遁斯山故世有郎山之名山內有郎山碑事具文徐水又逕郎山君子中觸鋒將軍廣南廟前有碑晉惠帝永康元年八月十四日壬寅發詔錫君父子法祠其碑劉曜光初七年前潁丘太守郎宣北平太守陽平邑振等共修舊碑刻石樹頌焉徐水又逕北平縣縣界有漢熹平四年幽冀二州以代子詔書遣

水經

卷之十一

二十一

冀州從事王球幽州從事張眼郡縣分境立石標界具揭石文矣徐州又東南流歷石門中世俗謂之龍門也其山上合下開開處高六丈飛水歷其間南出乘崖傾瀾泄注七丈有餘湍盪之音奇爲壯猛觸石成井水深不測素波白激濤襄四陸瞰之者驚神臨之者駭魄矣東南出山逕其城中有故碑是太白君碑郎山君之元子也其水又東流漢光武追銅馬五幡於北平破之順水北乘勝追北爲其所敗短兵相接光武自投崖下遇突騎王豐於是授馬進保范陽順水蓋徐水之別名也徐

水又東逕蒲城北又東逕清苑城又東南與沈水出蒲西俗謂之泉頭水也地理志曰北平縣有沈水東入河卽是水也東逕其城又東南左入徐水地理志曰東至高陽入河今不能也徐水又東左合會曹水出西北水也寧縣曹河澤東南流左合岐山之水水出岐山東逕邢安城北又東入南曹河曹水又東南逕北新城縣故城南河南又逕北新城故城北此王莽之朔寧縣也曹水又東入于徐水水又東南逕一故城北俗謂之祭過城所未詳也徐水又東流入博水地理志曰徐水出北平東至高陽入于博又東入滹地理志曰博水自望都東至高陽入于河

又東北入于易

滹水又東北逕依城北世謂之依城河他說無依城之名卽古葛城也郡國志曰高陽有葛城燕以與趙者也滹水又東北逕阿陵縣故城東王莽之阿陸也建武二年更封岸將軍任光爲侯國滹水東北至長城注于易水者也

水經

卷之十一

二十一

水經第十一